


Fundacion Famia Planea ta celebra 43 añ a promoviendo paternidad responsabel



ORANJESTAD (AAN): A funda Fundacion pa Promove Paternidad Responsabel, nomber oficial di Famia Planea, riba dia 24 di november 1970 bou di e leynan di Antiya Hulandes. Y dia 1 di juli 1971, e fundacion a cuminsa opera oficialmente fo'i su prome oficina situa na San Nicolas.

Aki e director y dos miembro di staff tabata tene


contacto cu e dokternan pa asina compila data y provee anticonceptivo. Desde e tempo ey tambe a cuminsa supervisa e programa educacional y ora tabata necesario, e trahadonan tabata bishita diferente cas. E meta principal di e fundacion ta pa promove e ideanan di paternidad responsabel den tur sentido di palabra. Pero teniendo na cuenta principalmente e norma – y balornan, cultura y religion di su comunidad. Na principio tabata pone hopi atencion riba planeamento di famia, e uzo y distribucion di anticonceptivo. Despues a mira e necesidad enorme pa pone enfasis riba facilita informacion y brinda mas

educacion riba e tereno di salud sexual.

Durante traspasso di aña, Famia Planea a pasa den diferente cambio, p.e. cambio di e directornan, cambio di e miembronan di staff, cambio di e miembronan di directiva y sin duda ... e cambionan di edificio. Un di e cambionan mas grandi ta, e mudamento di e oficina principal di San Nicolas pa Oranjestad.

Den luna di juli 2009 a muda pa Oranjestad, mirando cu e cantidad di miembronan a aumenta barbamamente na Oranjestad, specialmente entre e hobennan, door di e enfasis poni riba embarazo hubenil. Cu e cambio grandi aki a introduci un systema automatiza di registracion pa asina por analisa y adapta e strategia di e fundacion.

Indudablemente, e campaña integral di 'I LOVE MY BODY' desde aña 2010



cu enfoke pa hobennan stima y balora nan curpa, a contribui inmenso na fortifica e relacion cu tur scol, NGO's, sector priva, sector publico, mayornan, educadornan, dokternan, gobernantenan, prensa y specialmente nos hobennan.

Finalmente Fundacion Famia Planea kier duna un palabra di danki na henter e comunidad di Aruba, pa e tremendo sosten ricibi durante e 43 añanan tra'i lomba y alabes invita un y tur pa sigui haci uzo di nos servicionan pa hunto nos forma un comunidad di paternidad y maternidad responsabel.



Ta bo curpa, cuid'e!

Avenida Milo Croes 17-B

Dakota, Aruba

T. 588-9591 / 584-9591

F. 588-1107



famiaplanaa@hotmail.com - www.famiaplanaa.org